



ՀՈԳԵՇՆՈՐՀ Տ. ԲԱԳՐԱՏ ԱԲԵՂԱ ԳԱԼՍՏՅԱՆԻ ԱՆԴՐԱՆԻԿ ՔԱՐՈԶԸ ՄԱՅՐ ՏԱՃԱՐՈՒՄ

«Յանուն Հօր եւ Որդւոյ եւ Հոգւոյն Սրբոյ»:

«Մի երկնչիր, յայսմհետէ զմարդիկ որսայցես ի կեանս»:

«Մի երկնչիր, այսուհետև մարդիկ պիտի որսաս կյանքի համար»:

Սիրելի քույրեր և եղբայրներ,

Աստուծո տնտեսության մեջ, Արարիչ Աստված և մարդ հարաբերության ժամանակ, երբ մարդ, ուղեկից ունենալով ինքնաճանաչողության և ինքնաքննության լույսը, իջնում է իր հոգու խորքերը՝ աչնտեղից առավել փառավորությամբ տեսնելով Աստծուն ամբողջ մեծավայելչությամբ, պարզապես թելադրված իր հոգուց, ստիպված է լինում կանգնելու Նրա առջև և կրկնելով Պետրոս առաքյալին ասելու. «Ի բաց գնա յինէն, Տէր, զի այր մեղաւոր եմ ես»:

Այդպես եղավ նաև մեր ողջ ուսանողության շրջանը, երբ մուտք գործեցինք Մայր Աթոռի դարպասից ներս, որպես անփորձ և որոնող երիտասարդներ ցանկացանք գնալ Աստուծո լույսի ետևից: Եվ այդ ճանապարհին, մեր խոկումների ու աղոթքների պահին, ի դիմաց կանգնելով Մայրավանքիս Սուրբ Խորանի, միայն մեկ նախադասությամբ արտահայտեցինք մեր ողջ զգացումներն ու ապրումները. «Ի բաց գնա յինէն, Տէր, զի այր մեղաւոր եմ ես»:

Սակայն հազար Փառք Աստուծո, որ Իր Եկեղեցու կանչի և կոչի միջից հնչեցրեց Իր քաղցրահունչ ձայնը, թե «Մի՛ երկնչիր, յայսմհետէ զմարդիկ որսայցես ի կեանս», որի համար կրկին ու կրկին խոնարհվելով Նրա փառքի առջև, ասում ենք. «Օրհնեալ ես Դու Տէր եւ օրհնեալ են փառք մեծութեան Քո», որ մեզ բարձրացրեցիր և կարգեցիր առաքյալներիդ առաքելակից, հրեշտակներիդ պաշտոնակից ու հավասարակից այս ահեղ խորհուրդին:

Վեհափառ Տէր, Աստուծո հայացքի առջև, ի դիմաց մեր հոգևարական դասի և հավատացյալ ժողովրդի, նախ ցանկանում եմ գլուխ խոնարհել երջանկահիշատակ Վազգեն Վեհափառի շիրմին և հարգանքի տուրք մատուցել նրա անմահ հոգուն, ու այս զգացումով, սաղմոսանվագի համաձայն, իմ սրտի խորություններից շնորհակալություն ու երախտագիտություն հայտնել Ձեզ, որ արժանի համարեցիք մեզ դառնալու սպասավորը Աստուծո Սուրբ Սեղանի: Վազգեն Վեհափառը եղավ մեր առաջին քայլերն ուղղողը դեպի

Աստված տանող հավերժագնաց ընթացքում, իսկ Դուք՝ դրանք ամբողջացնողն ու Աստծուն ընծայողը: Նա մեզ համար մի տեսակ մարմնավոր ծնող եղավ հոգևոր դաշտի մեջ՝ ցույց տալով դեպի Մայր տաճարի դուռը տանող ճանապարհը, իսկ Դուք եղաք մեր հոգևոր ծնողը Սուրբ Խորանից պողաբերմամբ: Նա մեզ ընկղմեց Բեթղեհեմի Սուրբ Ծննդյան այրի մեջ, իսկ Դուք բարձրացրեցիք Գոգղոթայի ամենավաճառ բարձունքը. առանց առաջինի երբեք ու երբեք չէր կարող լինել երկրորդը, բայց առանց երկրորդի՝ անորոշության և անիմաստության մեջ կմնար առաջինի տարողությունը:

Վեհափառ Տեր, կրկին ու կրկին անգամ շնորհակալություն եմք հայտնում Ձեզ, որ Ձեր Աստվածադիր Աջի դրոշմումով և կնիքով մեզ միաձուլեցիք այդ Բարձունքին՝ դարձնելով ուղեգորգ մահվանից դեպի կյանք ճանապարհի, մի փոշեհատիկ՝ Հայաստանյայց Առաքելական Եկեղեցու այս հսկայական Աստվածակառույց հոգեշենքի մեջ: Եվ այս իսկ պահին խոստանում և ուխտում եմ լինել հավատարիմ զավակը, անորոշումն ապաստվորը և որդի-ծառան Մայր Եկեղեցու և նրա Գահակալի, որ է հնազանդվել և ծառայել Աստծուն, Ընդհանրական ու Տիեզերական Եկեղեցուն, նրա անցյալի ժառանգությանը և ներկայի միջոցով՝ ապագայի առաքելությանը:

Աղոթեցեք և օրհնեցեք մեզ ման դուք, սիրելի հոգևոր եղբայրներ, որ որոշակի ժամանակ առաջ խրատատու և կրթիչ հայրեր էիք, իսկ այժմ՝ խորհրդատու եղբայրներ: Մենք մեկ առաքելության եմք կոչվել՝ մարդկանց «ի խաւարէ ի լոյս, յանգիտութենէ ի գիտութիւն ճշմարտութեան» բերելու, և վստահ եմ, որ յուրաքանչյուրիս էլ տարբեր հոգեվիճակներում լավել է Տիրոջ ձայնը, թե «Մի՛ երկնչիր, յայսմհետէ զմարդիկ որսայցես ի կեանս»: Մեզ համար այդ կյանքը ամբողջանում ու իմաստ է գտնում Սուրբ Էջմիածնի շրջագծի ու ճառագայթման մեջ, որը անհուն ու անպարփակ մի տարածություն է, կյանք ու ապրելու եղանակ: Եթե մեր կյանքի որևէ հատվածում բացակայի այս աստվածային դրվածքը, ապա իզուր եմք ապրել մենք, և անիմաստ է ընթանում մեր կյանքի անիվը:

Սիրելիներս, մեզանից յուրաքանչյուրը, որպես իր հոգու կանչի արտահայտություն, բազում անգամներ է մուտք գործել Սուրբ Էջմիածնի պատերից ներս: Բայց պարտավոր եմք մուտք գործել **մտնելով** այնտեղ, ոչ թե շոշափել-անցնելով, այլ միախառնվելով ու ներծծվելով այս սրբացած քարերին, որոնք հիմնադրվել են Սուրբ Կուսանաց արյան ոռոգումով, մեր Սըրբահոր՝ Գրիգոր Լուսավորչի արցունքի ու տառապանքի շաղախով և Տիրոջ կողմից այս ամենի երկնային շողերով գմբեթավորմամբ: Մեր առջև տեսական հարցադրում և կյանքի խնդիր պիտի լինի, թե որքանով եմք արժանի այս ճշմարտությանը, որքանով եմք իսկապես ծառան այս հաստատության: Արդյո՞ք ամեն անգամ կարողանում եմք մեր երջանկությունը գտնել այստեղ, արդյո՞ք մեր կյանքը իսկապես խարսխել եմք Հիսուսի ճշմարիտ Եկեղեցու վրա և այդ Եկեղեցու միջի՞ց եմք տեսնում մեր հետագա գործունեությունը կամ մեր հետագա կյանքը, որ է՝ հասնել մի երանական վիճակի՝ անդադար փառավորելով Աստծուն իր ամբողջության և կատարելության մեջ: Այս տաճարից մուտք գործելիս, ցանկացած մարմնական գործ մոռացությամբ մեկ կողմ թողնենք՝ մտքի սլաքը ուղղելով դեպի երկինք: Իզուր և թափուր է մեր մուտքը այստեղ, եթե չկա հոգու խրախճանքը, եթե այն սոսկ մարմնական և արտաքին ձևապաշտություն է: Աստուծո փառաբանվող և օրհներգվող անունը ոչ թե լոկ շրթնային ու կոկորդային բար-

բաջանք է, այլ հոգու հրայրք, բոցկլտում, այլապես այն կնմանվի պղնձից արձակված դատարկ հնչյունի: Մեր հոգու հրճվանքը արտահայտենք ոչ միայն աղաղակ բարձրացնելով, այլ լուսավառված սրտերով, կյանքի մաքրությամբ և ողորմածությամբ: Եկեղեցին հանդիսավառ ու լսելության տեղիք չէ միայն: Այստեղից անհրաժեշտ է դուրս գալ միշտ օգուտ քաղած և աստվածային պատգամներով լցված: Եկեղեցուց հեռանալիս ձեր այստեղ արթնացած մտքերն ու զգացմունքները ձեզ հետ տարեք տուն ձեր ընտանիքներին ու երեխաներին, բարեկամներին ու հարևաններին որպես բուրումնավետ ծաղիկներ և անուշահամ մրգեր: Եվ այդ ժամանակ ձեր բնակարանները կդառնան աստվածային գեղեցկագույն պարտեզներ, իսկ կյանքը՝ աստվածային հրաշալի խնջույք:

Մենք, կոչվելով այս սրբազան ծառայության ու առաքելության, ամբողջական գիտակցությամբ ու ընկալումով խոսք ենք հղում ձեզ, սիրելի քույրեր և եղբայրներ, լինենք Տիրոջ հավատարիմ ծառաները՝ մշտապես մեր ուղեղների մեջ դրոշմելով, որ այս երկրի վրա գոյություն ունի Աստուծո իրավահաջորդը՝ Եկեղեցին, ոչ միայն մեր սրտին հարազատ Հայաստանյայց Եկեղեցին, այլ նաև նրա լույսերի միջից երևացող Ընդհանրական Եկեղեցին, որ միայն այսօրվա Եկեղեցին չէ, այլ անցյալի և ապագայի: Այս հրավերն է ուղղում մեզ Հայաստանյայց Առաքելական Սուրբ Եկեղեցին՝ մարմնավորելով թե դարձեք դեպի Ինձ, և Ես պիտի դառնամ դեպի ձեզ: Եվ այս ճանապարհով՝ հոգու ճանապարհով կկարողանանք տեսնել Աստուծո լուսավոր դեմքը, քանզի արտաքին ճանապարհը մշտապես խցանված ու փակ է:

Այս իսկ խոհերով և պատգամով, «հաստատուն մնացեք, մխիթարվեցե՛ք, միաբա՛ն եղեք, խաղաղությո՛ւն արեք, և խաղաղության ու սիրո Աստվածը թող լինի ձեզ հետ: Ողջո՛ւյն տվեք միմյանց սուրբ համբույրով» Մայր Եկեղեցու տաճարացման հովանու ներքո:

«Մեր Տեր Հիսուս Քրիստոսի շնորհը, Աստուծո սերը և Սուրբ Հոգու հաղորդությունը լինեն ձեզ հետ» հավիտյանս. ամեն:

